

韋

齋

集

附
玉
瀾
集

三

學

書

集

卷

四

上

卷

四

四

四部叢刊續編

章齋集

(一〇二〇六)

翻刻必究

中華民國二十三年八月初版

本書實價國幣貳元貳角

外埠酌加運費匯費

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

英偉豪傑之士生必有所自來故
其亡也決不泯二與草木俱腐觀
玉瀾先生之集顧不異哉夫得則
喜失則悲有所不平則怨刺此詩
人之情也惟深於道者不然無入
而不自得先生近之先生少有軼
才自負其長不肯隨俗俯仰厄窮

蹉跎有人所難堪而其節愈厲其
氣益高其詩間暇畧不見悲傷憔
悴之態其視富貴利達真糝糠土
苴爾春風一篇雍容廣大有聖門
舞雩氣象感事三篇慨然見經世
之志自作挽歌詞齊得喪一死生
直歌友淵明於千載至所謂自我

識興廢於天無怨尤非深於道者
能如是乎嗚呼以先生之才使其
作於聲詩薦之郊廟發其所蘊措
諸事業何愧古人百不一售使後
世所以知公者獨此數十詩而已
悲夫先生有兄曰韋齋白首郎潛
不寃大用人以為恨其詩凌厲高

古有建安七子之風常齋之子南
康史君今又以道學倡其詩源遠
而流長信矣哉淳熙辛丑仲春望
日梁谿尤袤敬跋



常齋集卷之九

新安朱松喬年

書

代人上郡守書

竊以明天子閔仁遠民思有以鎮綏之輟閣下於臺
端之重付以一州視事未幾塗炭之遺民人人自以
為將被惠澤困於貪暴之吏抱抑屈而不得申者人
人自以為有所赴愬州縣之吏潔操行抱才譖者皆
奮迅澡被人人自以為將受知於下執事某於此時
實備下吏竊嘗自念士之仕於州縣者雖其志不足

以及遠然上之則欲扶持柔良折伏姦暴獄訟必毋失其平施舍必毋失其中稱朝拜所以委使之意以求知於上下之猶欲整簿書急期會期於無過以免訶譴詰責之辱又不及是而愈下則刑戮斥逐加之而不以為過今政和建之下邑也剽盜之後民無蓋藏且闢公門訟訴之牒不能十數常賦之輸比他邑或不能十五無豪宗大姓陵轢細民以廢亂政化地斗入東南與溫福為境又非孔道共億厨傳之費以某之庸疎處于此竊自隱度以為奉令承教或可以無過聽於下風今者廼聞閣下有意督過之深恐進

見之際迫於威嚴區區之意造次不能以自達輒以尺書控愬於下執事某少失先人與老母相倚為命今行年逾七十矣今夏暑方甚府中遣吏持檄敦迫赴官冒大暑扶持上道到官未幾得寒暑之疾妨於飲食寢興須人至今未平也方得疾之初山邑無醫藥回皇怵迫莫知所以為計適聞大旆入境念當具圖籍抱符鑰跪起屬吏之末庶幾咨稟條教聽受約束仰稱閣下具宣明天子德澤之意欲前不能進退維谷者累日夫親疾之所以亂其方寸者如此則獄訟施舍簿書期會之間容有精力之所不周照察之

所不及雖加之以刑戮斥逐其孰以為不宜乃若某
之情則猶有可言者韓延壽為東郡太守嘗出臨上
車騎吏有後至敕功曹議其罰門卒建言曰今旦明
府命駕未出騎吏父至府門不敢入吏趨出省父而
見罰得毋虧大化乎閣下方崇獎名教以整頓人物
必將有處於此以閣下望實之重督責之精明如此
而某平昔之志亦粗欲求知於世不至自棄於沒沒
無聞之地而蕞爾之邑非有難集而不可為者儻假
之以旬月之期以閣下之靈老者飲食起居漸復於
舊敢不勵精畢力僵仆無所避若猶吏治弛廢過惡

暴列將投被自刻以聽命于有司閣下雖加以虧除
寬免之惠亦不敢承也

答莊德粲秀才書

某頓首昨屈車馬甚寵顧區區未能欸扣所聞辱惠
書禮盛志謙雖不敢當然近世大學之道蕪廢士無
貴賤徇世相師千百一範莫知孰使陶之者不自量
其愚不肖竊有憐之之意頃來尤溪甫兩月雖獲遍
拜邑中之士而未詳也索居深念惟小人之歸是憂
乃有識明志高傑然自拔於流俗如吾友者其為欣
幸未易具道夫仕而志學如農夫快一朝之飽而釋

終身之耕殍於溝中可立而俟然則仕而志學猶飽而念耕亦不足道也抑聞之先生長者禮記多魯諸儒之雜說獨中庸出於孔氏家學大學一篇乃入道之門其道以為欲明明德於天下者在致知格物以正心誠意而已其說與今世士大夫之學大不相近蓋此學之廢久矣自周衰楊墨雖得罪於聖人然乃學仁義而失之者至申韓儀秦之說勝而士始決裂聖人之藩牆以阿流俗之所好至漢文景之盛未衰也以至于今蓋嘗有以斯文為已任者起而倡之然世方嬰於俗學以自強屹乎其不可攻也某方急於

祿養未能徃究其所學是以或聞吾友之言凜然敬
歎若居夷而聞雅雖未詳其節奏之工然卓然於吳
歛楚謠之中而不可亂也書曰知之非艱行之為艱
夫問塗而之旨則知亦豈易哉以吾友之明苟以德
為車而志氣御之則朝發軔乎仁義之塗而夕將入
大學之門以躡中庸之庭也如某之駑憂且追後乘
而莫及其何以相吾子在勉之而已若舍此而問塗
則今之學士大夫皆知津矣未即款晤自愛之望

上唐漕書

某嘗不自揆以所學乎古者妄論天下之勢以謂一

介之士歛然自修於環堵之中其勢力輕重不足較於世也明甚至其風聲氣俗則有天下盛衰理亂之所繫者蓋嘗竊怪先王之時其士君子皆敦厚朴實溫然而自重富貴利祿若不足以介其意而後之君子髣髴其餘風者何其少也其一時號為名卿才大夫者名雖滿於天下而道不足以善當世之俗勢雖臨於一時而德不足以悚來世之風上下相持以入於弊而風聲氣俗不可復振無足怪者三代而上其詳不可盡知然詩書所傳猶可想見士之退處於陋巷者時君世主招以弓車聘以幣帛有非其物者欲

見且不得而況可屈乎故上之求其下也不敢輕非
獨一日之勢有加乎士者不敢輕蓋雖天子不敢輕
也故士之自待也不敢不重詭遇而貪得者出不容
於朝歸不齒於鄉故下之望乎上者不敢以已之所
不至者徼幸於一時而皆止於至足之分蓋在上者
尊德樂義之誠不如是其至不足與有為而士之自
立於世者不如是不可責以有為也後世不然上之
則有科舉誘之於前使之決道義之藩以阿世俗之
所好下之則有薦舉推之於後使之罔廉恥之隅以
徇私意之所欲其間固不能無卓然自信異於孟子

所謂凡民者然積習日久百世一範而猶責其有為
於世其亦踈哉嗟夫此豈獨士之罪也嘗讀成湯禱
桑林之詞有曰士失職者知士固有職必求所以克
之蓋其從事於六藝之文而歷觀古今治亂興亡之
變隱之吾心而不遠質之聖人而不戾達之當世而
不悖此士所學乎先王之道者也是道也得之心得
之身發之言推而被之天下無二焉士惟有得於是
也抗顏不讓自任以天下之重而君子不以為誇待
之不以其禮則翩然去之而君子不以為傲與天子
周旋以圖回四海而君子不以為泰抱關擊柝寸祿